

續修崞縣志

卷六
人物志下

續修崞縣志卷六

人物志下

義行

宋

高万豪於財心存利濟居申村在陽武河畔河水不時漲發沿河田畝率廢爲曠土万憂之相其地勢鑿渠築堰引漲水以資灌溉數千畝瘠田遂皆變爲膏壤至今利之事在嘉祐熙寧間蓋肇興陽武水利者

明

梁洪崇仁都人張鑑神原都人正統六年歲饑各出穀千餘石助賑事聞勅旌建坊並給羊酒免差役

石公廉左廂都人王志厚王就都人郝士榮貴茹都人天順二年饑各賑粟四百石事聞勅旌建坊並授七品散官

武士榮大莫村人天順六年大饑賑米五百石詔旌其閭賀桂在城都人庠生萬厯三十七年歲饑縣令諭民出粟桂與王文炳何耀龍李迎春李蘭香李天資劉應臺各捐穀百數十石賑濟事聞詔給冠帶匾額旌之

冀奉錢史三元皆大南上都人萬厯間歲饑與王大順狄
來甯弓濟邦張萬純張廷倫賈從龍賈守奎閻思榮寇
九思鄭國棟李如櫻祖榮同出粟救荒事聞詔給冠帶
匾額有差

李可久庫興都人天啟年歲貢授孝義訓導士服其教後
歸樂善好施於本城玉皇城隍關廂關帝岱山各廟及
白衣菴均施地五畝又施大林村丁字路爲善不倦鄉
里重之

王永字維遠上陽武人好善急公崇禎年奉知縣鄭獨復

牛斗命督修盧家莊堡圍塋驛堡事竣撫憲嘉其忠赤
給以匾劄賜効勞堡官

王納誨城關右都人崇禎末由拔貢任浙江衢州府推官
甫蒞任有金姓吏獻前官鄧某遺金二千餘兩納誨佯
受之密遣人召鄧子至悉還之讞斷刑獄以明允稱

楊資捐金三百兩完官賦得旌表又石盤代償民逋張存
智還金輸賑閭俊鑿山架橋俱有義聲

張友資大常村人任陝西階州知州嘗於圍塋驛創建茶
亭並施地六十畝爲每歲施茶之資

國朝

賀海晏桂之子歲貢生縣丞某以木笥寄於其家值亂笥物盡失餘未細檢晏後修笥於重底敗絮中檢得白金三百七十餘兩時丞已卒白之官召丞子至悉還之

張珣大陽都人庠生順治初土寇四起有興嵐婦女數十被掠至崞珣候賊他出潛取之收置菴中日給薪米悉訪其家歸之子夢龍尤樂善好施捐修白彪村關帝廟茶亭及陽武河車橋並置沃地六十畝爲修橋資歲給橋夫冬衣布四疋子孫遵行勿替

狄從周字監之陽武村人康熙初甯武楊光祖宦於楚從
周爲記室值吳逆構難撲岳州常德等處楊誓以死殉
遂託二子鯤鵬於從周曰吾死義也二子宗祧攸關公
能爲公孫杵臼程嬰事乎從周唯唯卽攜二子遠避艱
苦備嘗厯數月安親王至從周將光祖殉難事白於王
王嘉獎之後鯤官至廣東陸路提督鵬官總鎮爲從周
樹義士碑於村南從周壽九旬六子俱成名一女未婚
守節

栗秀堯字獻玉大南上都人性孝尙氣謹里人有爲盜謨

者傾產代白之茭之諸孫曰極致者有聲庠序極敬極教極敏乾隆庚午同舉於鄉咸以爲先德之報云

馮國琛 恩貢生篤宗族好貸濟貧不能償者悉焚其券嘗謂鄉人曰爲善最樂愧我有志未逮也時推老成典型邑舉鄉飲禮延爲大賓

侯覲王神原都人家席豐樂於施濟親族有不能婚葬謀生者時周恤之遇因利爭訟者出貲調和焉子泰臨泰來泰元泰交俱入庠

亢履和字藹然臨沱街人監生性仁厚多義舉西山人有

負債鬻妻者卽代償其債夫婦獲完聚後鬻妻者負薪來酬卻不受且周給之子騰鵬邑庠生尤勇於爲義邑有善舉率皆倡捐督理有石姓者貧不給將捨其幼孫爲僧騰鵬勸止之時時周恤無德色五臺徐中丞繼畬表其墓曰亢宗之隱君子諸孫光斗光壁皆舉於鄉各有傳

李瑤字維玉唐林都人性仁厚行多義舉嘗爲其祖卜穴地相久不就一日偕地師赴西郊行且卻地師問故瑤低語曰彼童子伐吾樹恐其驚墜也地師斂容曰君如

此存心何地不吉遂定穴焉後生子四長慶春官至貴
州副總兵

杜廷諫魏家莊人急公好義凡造橋修路賑恤諸義舉輒
首先倡捐董理不辭勞瘁生子六延師教課歷十八年
無懈意子瀛登賢書濬涓淋湜俱諸生體泰授鞏昌府
經歷知縣陸如崗贈句云六子成名皆重器一生好善
乃完人蓋紀實也

郭定城字安民永興村人監生性孝善鍼術施藥二十餘
年無德色易簣時檢舊券悉焚之或曰六七千貲也曷

弗爲子孫遺定城日子孫賢將安用此否則適啟爭端耳同里有郭心傳者樂善好施代完國課設立義學比閭閻均以義稱

楊鵬飛三泉村人生員性仁厚通醫術施藥數十年活人甚衆子鉦鉞皆登武科孫淑解元曾孫文炳接踵登賢書又桃園村劉作楷亦以醫術不受人財稱義

武橋字躋僊小原平人監生舉介賓和易公直與物無忤訓徒三十餘年不受脩脯子孫相繼遊庠登賢書又南莊村趙灝恤貧周急教讀亦不受修脯時並稱之

張述祖東橋村人乾隆年於北門坡拾白金百餘衣物十數事訪知爲黃水村路某所遺悉還之又武舉張拱鄭家營村鄭吉元皆以拾金不昧稱義

張士傑銅川灣里人耆賓樂善好施村西奎光嶺乏水行人至此每苦渴煩士傑施茶數十年子聯生有父風村南十里岡道路狹隘過此者每因蹊田致訟聯生買地開途訟端遂息里人各爲勒石紀其事

亢而和大林村人捐地十畝餘爲修理本村陽武河橋之費又李滿銀捐貲重修白彪村關帝廟同白騰雲各施

地八畝爲修廟資其事俱勒於石

邢振鈞字秉國原平鎮人守備銜富而好施嘗患鎮南舊路沮洳捐貲修築並成梁以濟病涉里人勒石紀其善張旭泥河村人貧而好義縣南紅厓灣路爲忻崞往來通衢乾隆間屢經沱水浸沒輒阻行旅旭與同里四五人餽糧自裹就厓開路寬丈餘長三里許至今利賴之忻州知州汪本直以利涉有功表其閭

王安南郭下村人買地堰一處施爲界河鋪車路又關子村趙自通住持僧寂元施地爲路以便行旅當時並以

義稱

趙應學屯瓦村人村東有土厓亘於路應學捐金覓工修平季弟應選父鍾愛析箸時以千金公產讓之鄉里稱羨又榮華村呂有財捐貲修治石嶺關車路行人咸利賴焉

武止戈號西峯盧家莊人增生事親孝居鄉多義舉陽武河汜濫爲災止戈設法防禦永免墊溺又捐地基修石棧行旅便之子樹榮登賢書孫奏績入泮

白琚南陽村人從九品每冬捨棉衣設路燈復創建城北

樂善石橋及南陽中河板橋春坼秋成悉獨力任之數
十年不倦又陽武村韓普長樂村附貢劉贈皆以修橋
稱義

張養浩大陽都人與張克振張軾神山村邢克明陽武村
狄裕信西鎮村陳經德西嶺村尹萬順桃園村劉燦然
南莊村馮景原平鎮甯成義西坪村劉萬一石封村張
順親皆以行多義舉稱

胡成祖籍秀容父徙崞遂家焉少孤貧傭於賀氏三十餘
年賀歿家漸陵替遺弱孤二歲時奠祭成必具香楮攜

負二少主哭於墓煢煢無依惟賴成行汲鬻緡營生嗣
少主皆成立成復傭於西街楊澤深家卒後楊義其行
棺殮葬之邑舉人張震悉成生平爲銘其顛末勒石於
城西門外

樊懋字勉齋中陽村人耆賓里中某乙竊某甲物付諸質
庫甲稔知欲訟之官懋勸曰無以一事敗人生平乃代
乙贖物歸諸甲訟遂寢同時上封村武生孟旭亦以輸
貲息爭爲官紳所器重

賈鳳字來儀大吉都人武舉才略明勇性情質直鄉曲有

事必多方開導使兩相釋然以息爭端一時推爲人望
又小原平村武生武克諧永興村武生賈飛騰亦皆以
排難解紛見稱鄉里

張梧字鳳岡大陽都人性孝友嗜讀書幼失怙以舌耕奉
母母卒未葬每自塾中歸必宿於柩前中年補博士弟
子員知縣王公珠燿知其賢延爲書院董事實心經理
衆論翕服嗣後邑中凡有興作皆躬親倡首勞怨不辭
而於書院尤終始其事二十餘年如一日焉觀察馬公
某嘗稱之爲厯練老成本邑官師給公正勤勞匾以獎